

## Biografia di Jesus Maria Jose Kock (Joy)

**Jesus Maria Hose Kock** su fecha di nacimiento ta 2 di december 1938. Mayoria hende ta yama e Joy. Pero den transcurso di aña tocando na hotel, hopi hende ta yama e Joy Lerock y hopi di su amigonan ta yame El Tigre Ponce. Nomber di su mama difunto ta Olimpia Kock Ras. Su tata yama Juan Daniel Kock senior. Su mama a nace den e bario di Santa Cruz y su wela tabata traha na pastorie di Santa Cruz. Su tata ta di e bario di Klip y Joy a nace den e bario di watertoren na Oranjestad. E a crece y lanta den e bario ey. Nan famia ta consisti di 7 ruman y 1 di criansa, pues total 8 ruman. Joy ta e yiu di mas chikito. Joy ta casa cu Blanca Alsida Fingal. E tabata maestra di scol. Blanca a nace dia 9 di augustus 1941. Nan a casa dia 20 di november 1966. Joy tin 2 yiu homber, Kevin Reagan y Andy Michael. Kevin a nace na 1970. Andy dia 26 di juli 1975. Desde e tabata den scol preparatorio (kleuterschool), Kevin a tuma les di piano cerca señora Maybelline Arends Croes, despues tambe el a haya teoria di musica. E tabata un pianista cu por a toca hopi bon. Pero birando mas grandi, el a cambia di piano bay toca guitarra. El a bira guitarista. E ta toca semi profesional na diferente club nocturno y hotel. Tambe e tin su propio banda di heavy rock.



## Segun Joy e bida artistico a nifica un cambio den su bida



### E bida artistico

Segun Joy E bida artistico a nifica un cambio den su bida. Prome cu e a casa, su señora tabata sa caba cu e ta musico y tambe ambtenaar. Joy mester a haya permiso di Corsou pa e por toca banda di su trabou diario. Of e ta bira nevenarbeid, cu ta prohibi pa ley. Pero e a haya e permiso necesario banda di e funcion di un empleado publico (ambtenaar). Cu tocamento so bo no por cria bo famia. E respaldo di su señora

Blanca tabata 100% y e tabata un di e pilarnan tras di e organisacion pa OTI festival na Aruba. Nan tabatin un directiva di Comision Cultura Arubano cu tabata yuda cubri e gastonan pa nos hendenan por a bay afo, pasobra esaki ta costa hopi placa. Bo tin cu bay cu un delegacion. Telearuba ta yuda y Gobierno tambe. Semper nan a bay cu un bon director di orkesta.

Desde mucha caba Joy ta kere cu su sentimiento mas grandi tabata actua como 'manager.' Semper e a gusta maneha desde su infancia teamnan di beisbol y di futbol di bario. Despues nan a bay den musica. Te hasta e a yuda e frèrenan cu maneho di musica. Nan ta forma orkestanan pa baile di cinta rond Aruba, por ehempel pa celebracion di Aña di La Reina. E banda grandi di frèrenan, naturalmente ta e banda di mas grandi cu Aruba tabatin e tempo ey. Nan a toca wals, mazurka y otro musica tipico di Aruba.

## Desaroyo Musical

E instrumento musical cu mas Joy a desaroya riba dje ta saxofon. Loke a dirigi e mas den e instrumento aki ta cu, despues di a termina Sint Dominicus College J. Kock a gradua pa diploma di Algemene Ontwikkeling, Dale *Garnegie effective public speaker and general management*, plus Avond Mavo y *time-management*, frèr Pedro a bin cerca Joy y puntre si e tin algun deseo of smaak di toca den banda di frere. Ya e tabatin un amigo, Alex Odor, cu tabata toca caba un poco. Joy a acepta. E a papia cu su mayornan tocante e asunto aki. Su difunto tata

tabata masha streng mes. Tanten cu e ta den banda cu frèrenan, no tin problema. Ey Joy a cuminsa toca riba e prome instrumento cu tabata clarinet. Despues e a pasa pa sax soprano. Despues sax alto y mas despues pa sax tenor. Esey ta loke Joy a toca den su carera como musico. Frèrenan a siña nan tur loke ta musica. Nan tabata uza e edificio na unda awe De Trupialen tin su encuentronan keto bay. E edificio ey y De Trupialen a haya pa hopi aña un bon number di ta un organisacion cultural hopi bon pa Aruba.



Echi Odor Alto Sax y Joy Kock Tenor Sax Den e banda Oruba Sextet

## Instrumento Musical

**Segun Joy cu tocamento so bo no por cria bo famia**

**Segun Joy, e Frerenan ta siña bo lesa den diferente compas (maat)**

Joy no a cumpra su prome instrumento. LAGO tabata subsidia e frèrenan. Bisdom tambe tabata manda placa pa cumpra instrumento musical y bo ta hay'e pa bay cas cune pa haci bo tarea di cas (huiswerk). Joy tabata haya les tur diasabra. Durante siman nan ta ensaya cu e banda grandi di entre 50 pa 60 tocado. Prome cu bo por toca basta bon, tabata un aña y mey y mientras tanto bo tabata toca, e frèrenan tabata yuda bo. Cerca e frèrenan tabatin solamente un saxofonista, Hernando Enrique. E tabata conoce saxofon y e posicionnan y ta siña bo con pa traha cu bo lipnan. E otro

frèrenan cu ta musico, ta yuda bo poco poco domina bo instrumento. Nan ta siña bo lesa den diferente compas (maat). Y nan ta toca mayoria marcha den 2/4 of 2/8. Anto ora frèr Alexius a tuma e banda over y cambia e repertorio, nan tabata toca mas musica di Aruba. Nan tabata acompaña aubade. Prome aya, ta na Hulandes so nan tabata canta. Pena la bida cu si bo mester canta na Papiamentu, pasobra problema lo bo tin cu gobierno di Corsou, Aruba y Hulanda. Tur cos tabata na Hulandes. Te hasta no tabata permiti pa papia bo mes idioma riba speelplaats na scol!

## Bandanan Musical



**Los Prinsipes**

despues den los Duques y despues bolbe bek den Los Prinsipes. Despues a bin mas grupo, anto nos a bay toca na hotel pa un tempo fiho. A bin sexteto Oruba. Oruba sextet a habri na Sheraton Hotel tambe. Joy a toca hopi aña na Sheraton Hotel y despues na e otro hotelnan. E a yega di toca pafo di Aruba, e.o. na Corsou y Boneiro. Despues a bin un banda grandi cu yama El poder Latino, of The Latin Power. Un banda grandi cu 2 saxofonista, ta Lucio Rivadeneira y su persona, e tres trompetistanan ta Eddie Giel, Boy Heronimo y Donny Geerman. Ossy Henriquez a toca trombon. Latin Power tabatin 4 cantante.

Despues cu e desaroyo a sigui, Joy a toca cu Los Prinsipes y e tabata un di e prome musiconan cu a toca semi profesional, na e prome hotel di Aruba cu ta Aruba Caribbean Hotel. E kier sa 15 aña of mas pasa, nan a honra Joy cu un plakkaat masha grandi como e prome musico cu a toca den los Duques. E ta corda Sr. Watty Vos, awe di feliz memoria, kende tabata toca timbal den los Duques y e tambe tabata toca ritmo y canta bolero, anto e ora ey e a bay canta den e conhunto ey. Despues nan a sigui den e otro bandanan na otro hotelnan tambe. Manera e di, den Los Prinsipes



**The Latin Power**

## Grabacionan




**Orkesta La Nueva Fuerza**

Personalmente Joy ta lamenta cu nunca Joy a graba como solista tocando saxofon. Semper e a compana otro artistanan. Joy ta corda e añanan den La Nueva Fuerza. Bo sa con hopi nan tabata graba. Fuera di esey e a compana hopi cantante manera Ro Agumbero cu a graba 4 te 5 CD completo di bolero. E a compana Tico Quilotte den su CD tambe. Tambe nan amigo, den feliz memoria, Tirso Steba. Su deseo t'ey pa graba su composicionnan di wals riba saxofon.

## Consideracion

E acontecimiento mas importante den Joy su bida artistico tabata fungi como president di e organisacion di eventonan, festivalnan grandi manera Voz di Aruba, Voz di Oro, Voz Supremo, Festival Voz Juvenil y OTI. E ultimo aki tabata grandi, pasobra Aruba a gana OTI Antiyas 9 biaha. Tabata un gran logro pa 9 biaha Aruba a representa Antiyanan Hulandes den exterior. J. Kock tabata Hefe interior di Instituto di Cultura Aruba (I.C.A.), president di Managementteam di I.C.A. tambe Consehero di Ministerio pa asuntonan cultural.



**Joy su deseo  
t'ey pa  
graba su  
Composicion  
nan di wals  
riba saxofon.**

## Sugerencia

Mester disciplina. Tempo Joy tabata manager di hopi banda, di banda latina por ehempel no ta cuminsa train 8:00 or y no cuminsa stem 8:00 or. Si 8:00 or a bati anto bo no ta cla bo ta haya un boet. Esun cu yega laat ta haya boet. E penningmeester ta houd bij ken ta haya boet, despues e boet ta wordo reparti na esnan cu si tabat'ei. Tabata 25,00 florin cu ta hopi placa e tempo ei. Nan tin cu zorg bin ora tin toca na tempo. Bisti manera mester bisti. Tabata tin tiki problema. Pero unda tin hende chencho tin problema. Abo mester balance con e problema ta y keda positivo semper. Keda mira bo dilanti. Mira e meta cu bo kier yega te ora bo yega'e.